

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- लोकसभा चुनाव 2024 दे 5में गेड़ लेई दाखले नामजदगियां वापस परताने दा अज्ज खीरी ध्याड़ा ऐ। इस गेड़ तैह्त जम्मू कश्मीर दी बारामुला सीट लेई वोट पोआए जांगन।
- लोकसभा चुनाव दे 7में ते खीरी गेड़ लेई अधिसूचना कल जारी कीती जाग। प्रधानमंत्री मोदी वाराणसी सीट लेई 14 मई गी अपना नामांकन भरगंन।
- उपराज्यपाल मनोज सिन्हा होरें कल गाजीपुर च केई समारोहें ते सेमीनारें गी संबोधत कीता। उनें आधुनिक शिक्षा ते शासन बवस्था राएं भारतीय संस्कृति ते परम्पराएं दे संरक्षण पर जोर दित्ता।
- रक्षामंत्री राजनाथ सिंह होरें आखेआ ऐ जे भारत गी पाकिस्तान दे नजैज कब्जे आले जम्मू कश्मीर दे इलाके गी हासल करने लेई कुसै ताकत दे इस्तेमाल दी लोड़ नेई ऐ की जे उत्थूं दे लोक गै म्हेशां लेई भारत दा हिस्सा बनने लेई उत्सुक न।

<><><><><><>

Withdraw Date

लोकसभा चुनाव दे 5में गेड़ लेई नामजदगियां वापस परताने दा अज्ज खीरी ध्याड़ा ऐ। जम्मू कश्मीर दे बारामुला लोकसभा हल्के ते लद्दाख दी इक्कली सीट लेई इस गेड़ तैह्त 20 मइ गी वोट पाए जाने न। मेदवार जेकर चाह्ग तां अज्ज दपैहरी 3 बजे तगर रिटर्निंग अफसर हुंदे दफतर च अपना नामांकन वापस परताई सकदे न। नामजदगी आले कागज पत्रें दी जांच मगरा हुन 23 मेदवार चुनाव मैदान च न, जिंदे च साबका मुखमंत्री ते नैशन कांफ्रेंस दे उप-प्रधान उमर अब्दुल्ला ते साबका मंत्री सज्जाद गनी लोन बी शामिल न। लद्दाख च 5 मेदवारें दे नामजदगी आले कागज-पत्र दरुस्त पाए गे न, जिसलै जे 3 मेदवारें दे नामांकन रद्द बी करी दित्ते गे न। लद्दाख सीट लेई जेहड़े 5 मेदवार चुनाव मैदान च न, उंदे च बीजेपी दे ताशी ग्यालसन ते कांग्रेस दे तसेरिंग नामग्याल शामिल न। इंदे अलावा त्रै आजाद मेदवार मोहम्मद हनीफा जान, सज्जाद हुसैन कारगिली ते काचो मोहम्मद फिरोज बी चुनाव मैदान च न। तोआई इस म्हीने दी 7 तरीक यानि मुल्खै भरै दे 10 राज्यें ते इक केन्द्र शासत प्रदेश दिएं कुल 93 लोकसभा सीटें पर त्रिए गेड़ तैह्त वोट पाए जाने न।

<><><><><><>

LS-7th Phase

लोकसभा चुनावों में ते खीरले गेड़ लेई अधिसूचना कल जारी होग। इस गेड़ च 7 राज्यों ते इक केन्द्र शासत प्रदेश दी 57 लोकसभा सीटें पर मतदान होग। उत्तर प्रदेश ते पंजाब दी 13-13 सीटें, पच्छिम बंगाल दी 9 सीटें, बिहार दी 8 सीटें, ओडिशा दी 6 सीटें, हिमाचल प्रदेश दी 4 झारखंड दी 8 ते केन्द्र शासत प्रदेश चंडीगढ़ दी 1 सीट पर इस 7में ते खीरले गेड़ च मतदान होग। इस म्हीने दी 14 तरीक तगर नामजदगियां दाखल कीतियां जाई सकदियां न। इस गेड़ लेई मतदान पैहली जून गी होग। प्रधानमंत्री नरेन्द्र मोदी होर 14 मई गी वाराणसी लोकसभा सीट थमां अपना नामांकन भरगंन। ओह 13 मई गी अपने पार्लिमानी हल्के च रोड शो करगंन। कांग्रेस नै उत्तर प्रदेश प्रमुख अजय राय होरें गी इस सीट लेई अपना मेदवार बनाया ऐ।

<><><><><><>

MCC Violation PDP

पीपल्स डैमोक्रेटिक पार्टी पीडीपी प्रमुख महबूबा मुफ्ती होरें गी पिछले दिने राजौरी च शहादरा शरीफ इलाके च चुनाव प्रचार दरान इक स्कूली बच्चे दा इस्तेमाल करने दे मामले च कल “कारण दस्सो” नोटिस जारी कीता गेआ ऐ। एह नोटिस राजौरी दे अतिरिक्त जिला मैजिस्ट्रेट राजीव कुमार खजूरिया होरें जारी कीता। ध्यानजोग ऐ जे महबूबा मुफ्ती हुंदा इक वीडियो वायरल होआ हा जेहदे च ओ इक स्कूली बच्ची कोला चुनाव प्रचार करा रदियां हियां। इस वीडियो च एह स्कूली बच्ची लोकें गी पीडीपी दे हक्कै च वोट पाने दी अपील करै करदी ही। कल जारी इस कारण दस्सो नोटिस च महबूबा मुफ्ती होरें गी 24 घंटे दे अंदर अंदर एहदे पर जवाब देने लेई आखेआ गेआ ऐ। ध्यानजोग ऐ जे महबूबा मुफ्ती हुंदे खलाफ आदर्श अचार संहिता दी खलाफवर्जी दा एह पैहला मामला नेई ऐ 26 अप्रैल 2024 गी बच्चे दे अधिकारें दी राखी हिफाजत सरबंधी राष्ट्रीय आयोग नै इक रिपोर्ट पर संज्ञान लैता हा जे अनंतनाग-राजौरी संसदीय हल्के च महबूबा मुफ्ती हुंदे आस्सेआ चुनाव प्रचार च स्कूली बच्चे दा इस्तेमाल कीता जा रदा ऐ।

<><><><><><>

LG-Seminar

उपराज्यपाल मनोज सिन्हा होरें कल गाजीपुर च इक सैमीनार गी संबोधत कीता जेहदा विषय सार हा “भारतीय संस्कृति ते परम्परा गी सुरक्षत करने च आधुनिक शिक्षा दा महत्व”। अपने मुख भाषण दच उपराज्यपाल होरें आखेआ जे संस्कृति कुसै बी समाज दा अक्स ते ओहदी अवाज होंदी ऐ ते भारत एल्लै अपने समाज च नोजवानें अंदर अपनी संस्कृति ते परम्पराएं गी लेइयै मती उमंग ते दिलचस्पी पैदा होंदे दिक्खा करदा ऐ ते आधुनिक शिक्षा नोजवानें गी अपनी प्राचीन परम्पराएं गी कन्नै जुड़े दे रौहदे होई बी कुल संसारी सतह पर स्पर्धाएं च शामिल होने लेई तैआर करा करदी ऐ।

उनें आखेआ जे आधुनिक शिक्षा नै प्राचीन परमपराएं ते आधुनिक प्रौद्योगिकी बश्कार ते विज्ञान ते संस्करी बश्कार इक शानदार तालमेल विकसित कीता ऐं उपराज्यपाल होरें आखेआ जे शिक्षा च आंदे गै सुधारें कन्ने संस्कृति संरक्षण गी बढ़ावा थोआ ऐ ते आधुनिक शिक्षा दी मदद कन्ने इक बेहतर ते सनैहरी भविकख लेई मजबूत मुंड बी पाई दित्ता गोदा ऐ। उपराज्यपाल होरें “चन्द्र गुप्त मौर्य” हुंदे वंश ते उंदे सुशासन बारे बी इक होर सेमीनार गी बी संबोधत कीता जेह्दे च उंदे शासनकाल च समाजी बरोबरी, पिनयमें ते सिद्धांतें दी पालमा, शासन च आम जनता दी शमूलियत जनेइएं विशेषताएं गी उजागर कीता गेआं जियां जे पैहले बी खबर दित्ती जाई चुकी दी ऐ जे मनोज सिन्हा होरें कल उत्थूं श्री कुबेरनाथ मैमोरियल लेक्चर गी बी संबोधत कीता हा।

<><><><><><>

DC Samba

सांबा दे डिप्टी कमीशनर अभिषेक शर्मा होरें घघवाल ते बड़ी ब्राह्मणा बश्कार राष्ट्रीय जरनैली शिड़क दे रक्ख-रखाव दे कम्में दा जायजा लैता। उनें कम्म करा'रदी अजेंसिएं गी आखेआ ऐ जे ओह श्री अमरनाथ जी दी यात्रा गी सूचारू ढंगै सिर करोआने लेई शिड़क दा बेहतर ढंगे सिर रक्ख-रखाव करन। डिप्टी कमीशनर होरें निर्माण कंपनीएं गी आखेआ जे ओह कम्में दी रफतार गी बधान ते इसी श्री अमरनाथ जी दी यात्रा थमां पैहले पूरा करी लैन।

<><><><><><>

Raksha Mantri

रक्षामंत्री राजनाथ सिंह होरें आखेआ ऐ जे भारत, पाकिस्तान दे नजैज कब्जे आले जम्मू कश्मीर पर अपना दावा कदें नेई छोड़ग। पर एह्दे च भारत गी कोई बल जां ताकत दा इस्तेमाल करने दी लोड़ नेई पौग की जे उत्थूं दे लोक आपूं गै जम्मू कश्मीर च होआ'रदे विकास गी दिक्खियै तोले शा तौले म्हेशां लेई भारत दा हिस्सा बनी जाना चांह्दे न। इक समाचार अजेंसी गी दित्ते दे इक चेचे इंटरव्यू च उनें आखेआ जे जम्मू कश्मीर दे हालात च बड़ा मता सुधार आया ऐ ते मेद ऐ जे तौले ओ समा आई जाग जिसलै इत्थें थेआरबंद बलें गी विशेष इख्तेयार देने आले AFSPA कनून दी लोड़ नेई रौहग। उआं उनें आखेआ जे इस बारे फ़ैसला लैने केन्द्री गृहमंत्रालय दे इख्तेयारें दे दायरे च ऐ। असल कब्जा रेखा पर चीन कन्ने होने आले सैन्य गतिरोध बारे उनें आखेआ जे दौनें पक्खें बश्कार गल्लबात बरोबर जारी ऐ ते भारत दियां सीमा भलेया सुरखत न।

<><><><><><>

Search Operation

सुरक्षाबलें सुरनकोट, मेंढर ते राजौरी जिले दे होरने हिस्सें च व्यापक तपाशी अभियान चलाया ऐ तां जे पुंछ जिले च सुरनकोट थाहर भारतीय वायु सेना दी कानवाई पर आतंकवादिएं आस्सेआ घात लाइयै कीते गेदे हमले च शामिल आतंकवादिएं गी फगड़ेआ जाई सकै। इस हमले च वायु सेना दा इक कर्मी शहीद होई गेआ ते किश होर जख्मी होए हे। केई लोकें गी पुच्छ-पड़ताल लेई हिरासत च लैता गेआ ऐ। जम्मू जोन दे एडीजीपी आनंद जैन ते सेना ते खुफिया अजेंसिएं दे वरिष्ठ अफसरें घटना आली थाहर दा दौरा लाया हा। सेना नै हैलीकाप्टर दी मदद कन्ने इलाके दा हवाई सर्वेक्षण कीता। आतंकवादिएं दा अजें तगर किश पता नेई लग्गेआ ऐ। इआं मन्नेआ जा'रदा ऐ जे ओह घने जंगलें अंदर उठी गेदे न। अधिकारिएं मूजब इस आतंकवादी हमले दी मुख तौर पर साजश रचने आला साजिद जट्ट ऐ। एह आतंकवादी पाकिस्तान ते मकबूजा जम्मू कश्मीर थमां अपनियां गतिविधियां चलांदा ऐ। एह हमला अनंतनाग राजौरी पार्लिमानी हल्के लेई होने आले चुनाएं थमां पैहले होआ ऐ।

<><><><><><>

Shopian

दक्खनी कश्मीर दे शोपियां जिले च सुरक्षाबलें आतंकवादिएं दे दऊं मददगारें गी कल गिरफ्तार करी लैतां हासल होई दी इक पक्की सूह पर कारवाई करदे होई जम्मू कश्मीर पुलस, फौज दी 34 राश्ट्री राईफल्स ते सीआरपीएफ दी 178 बटालियन नै शोपियां जिले दे अलूरा इमाम साहिब ग्रां च इक जांच नाका स्थापत कीता। इस दरान सुरक्षाबलें आतंकवादिएं दे दऊं मददगारें गी हिरासत च लैता। उंदे कोला 1 पस्तोल, 1 मैगजीन, 8 राउंद, चीन च बने दे 2 हत्थगोले ते होर दुआ ऐतराज-जोग समेयान बरामद कीता गेआ ऐ। इस बारे इमाम साहिब पुलस थाने च मामला दर्ज करियै अगड़ी तफतीश शुरू करी दिक्ती गई ऐ।

<><><><><><>

CEO Kishtwar

किश्तवाड़ दे मुख शिक्षा अधिकारी होरें 2 प्रमुख शिक्षा इदारें जिंदे च करतुरबा ते किश्तवाड़ च जागतें दे मॉडल गौरमेंट हायर सकेँडरी स्कूल शामिल न, दा दौरा लाया। इस दौरे दा मकसद विद्यार्थिएं म्यारी शिक्षा उपलब्ध करोआना ते पढ़ने लेई विद्यार्थिएं आस्तै बेहतर माहौल ते बवस्था पक्का करना हा। निरीक्षण दरान सीईओ होरें इदारें गी बेहतर बनाने कन्ने जुड़े दे बक्ख-बक्ख मामलें गी पुट्टेआ ते शिक्षा लेई लोड़चदे म्यार ते होरने सुविधाएं गी बनाइ रखने लेइ आखेआ।

<><><><><><>

PL

आईपीएल क्रिकेट च जंदी रातीं कोलकाता नाईट राईडर्स नै लखनऊ दे एकाना स्टेडियम च खेड्डे गेदे इक मैच च लखनऊ सुपर जायंटस गी 98 रंजें कन्नै हराई दितता। 236 रंजें दे बड्डे लक्ष्य दा पिच्छा करदे होई लखनऊ सुपर जायंटस दी टीम 16 ओवर ते इक गेंद च शडे 137 रंज गै बनाई सकी। पैह्ले बल्लेबाजी करदे होई कोलकाता नाईट राईडर्स नै 20 ओवरें च 235 रंज बनाए हे ते इस जित्त कन्नै कोलकाता नाईट राईडर्स नै 20 ओवरें च 235 रंज बनाए हे ते इस जित्त कन्नै कोलकाता नाईट राईडर्स अंक तालिका च 16 अंके कन्नै शीर्ष उप्पर ऐ। कल इक होर मैच च चेन्नई सुपर किंग्स नै पंजाब किंग्स गी 23 रंजें कन्नै हराई दित्ता हा। अज्ज मुंबई दे वानखेडे स्टेडियम च मुंबई इंडियन्स दा मकाबला सनराईजर्स हैदराबाद कन्ने होग, मैच संजा साढे 7 बजे शुरू होग।

<><><><><><>